

Peqqissutsimut Avatangiisinullu Naalakkersuisoq
Landsstyremedlem for Sundhed og Miljø

Inatsisartunut ilaasortaq Anthon Frederiksen
Inatsisartut
Postboks 1060
3900 Nuuk

Dansk Polar Center pillugu Naalakkersuisunut apeqqut

Asasara Anthon Frederiksen

Inatsisartut suleriaasianni § 36, imm.1 naapertorlugu apeqquteqarputit, Dansk Polar Center-ip Kalaallit Nunaannut nuunneqarnissaani piginnaatitaaffiit akisusaaffiillu illutaalu eqqarsaatigalugit Naalakkersuisut sunik pilersaaruteqarlutillu isummersuuteqarnerisut.

11. okt. 2006
J.nr.
28.40.17/2006+01
All./Brev nr.

Postboks 909
3900 Nuuk
Oq/tel +299 34 50 00
Fax +299 32 54 10

Tamatumunga atatillugu nalunaarutigissavara, Naalakkersuisut siulittaasuata danskillu Statsministeriata aasaq manna Naalagaaffeqatigiit ataatsimiinneranni isumaqatigiissutigimmassuk, angalaneq pillugu nalunaarutip aqunneqarnera Kalaallit Nunaannut nuunneqassasoq. Taamaattorli aalajangiunneqanngilaq nuusseq tamanna qaqugukku pissanersoq.

Taamaalilluni tunngaviatigut aalajangerneqareerpoq, angalaneq pillugu nalunaarutip aqunneqarnera Namminersornerullutik Oqartussaniilissasoq. Tassalu assersuutigalugu sermersuarmi ilisimatusaatigalugu angalaniarnernut ilisimasassarsiorniarnernullu qinnuteqaatit oqartussaasunit suliarineqartarnerit maani nunatsinni isumagieqartalissammata.

Taamaattorli angalaneq pillugu nalunaarutip aqunneqarnerata saniatigut suliassanut allanut Dansk Polarcenter piginnaatitaaffeqarlunilu akisusaaffeqarpoq. Tamatumani ilisimatusaatigalugu angalanernut piareersaanermut aqutsinermullu kiffartuussisarnerit immikkut innersuussutigissavakka. Naalakkersuisut anguniagaraat tamassuma immikkoortua nunatsinnut aamma nuunneqassasoq.

Taamaattorli pingaartippara suliassat qulaani taaneqartut nunatsinnut nuunneqarneranni suut kingunerisinnaaneri misissoqqissaarneqassasut. Taamaammat 2006-imi ukiakkut suleqatigiissitamik pilersitsiniarpunga, suleqatigiissitallu suliassarissavaa piareersaanermut aqutsinermullu kiffartuussisarnerit kiisalu angalaneq pillugu nalunaarutip aqunneqarnerata nunatsinnut nuunneqarneranni suut kingunerisinnaaneraat misissoqqissaarnissaat. Suleqatigiissitap matumani aamma taamatut nunatsinnut nuussinermi aningaasaqarnikkut sulisoqarnikkullu pissutsit misissoqqissaassavai kiisalu taamatut nuussinermi pitsaaqutitigut ajoqutitigullu kingunerisinnaasai nassuiaateqarfigissallugit.

Suleqatigiissitaq aamma piareersaanermut aqutsinermullu kiffartuussisarnerup aamma Angalaneq pillugu nalunaarutip aqunneqarnerata Namminersornerullutik Oqartussat sortaani pitsaanerpaamik inissineqarsinnaanerannut imaluunniit avataaneersunik suleqateqarluni ataqatigiissaarinnissamut naliliinernik saqqummius-saqassaaq. Suleqatigiissitap misissueqqissaaneranut atatillugu taamatut nuus-

sinermi aningaasaqarnikkut qanoq kinguneqarsinnaaneranut naliliinermik aamma tigusaqarumaarpunga.

Apeqqutit imaqarnermigut § 36 pillugu apeqqummut allamut ukioq manna siusinnerusukkut inatsisartunut ilaasortamit Marie Fleischer-imit apeqqutigineqartumut assinguvoq. Taassuma apeqqutigaa Dansk Polarcenter-ip Nunatsinni suliaqarnermini piareersaanermut aqutsinermullu kiffartuussinermi qanoq kalaallinik sulisoqartigisarnissaa, kiisalu piareersaanermut aqutsinermullu kiffartuussinerup, angalaneg pillugu nalunaarutip kiisalu Nunatta avinngarusimasortaanut angalaniarnermi akuersissutit tunniunneqartarnerisa Dansk Polarcenter-imit Namminersornerullutik Oqartussanut nuunneqarnissaat qanoq periarfissaqartiginersoq. Taamaattumik apeqqutinut taakkununngaakissutikka 8. juni 2006-imeersunut aammattaaq innersuutigaakka.

Ikinngutinnersumik inuulluaqqusillunga

Asii Chemnitz Narup
Peqqissutsimut Avatangiisinullu Naalakkersuisoq